

29288

鄰吾田。顧日酷。耕者不勝。吾今當樹嘉木成陰。俾耕者少息。不爲酷日所困。一日有人聚談。中一長老言某少年有過。與衆斥之。諸少年同聲曰。吾乃未知所過。若果有之。則祝其晚死知戒。又歷見死亡。以傷其心。俾之自悟而爲善。又一日。有人言賊劫其家。吾言果此賊行剽。不至於悖理。吾將祝鬼神長佑此盜。保有所劫。至於勿壞。顧國富而妬於鄰。遂挑釁。奪其牛羊。脫族見劫。卽以使者告鄰。自陳無罪。自矢秉公而事天。貴國之行剽。詎欲得吾羊羴乎。或牛乳乎。土產乎。願釋其甲兵。前與吾處。吾請一一奉餉而無吝。若仍不已。則我待貴國以暴民。齒諸猛獸。強國聞言不之信。仍以兵來。謂脫族以空言自衛。不足深慮。顧脫人之志甚堅。聚其妻子於中心。而力衛其外。然仍時驚愕。此非愕敵兵之來。蓋痛惜人心。胡以如是之暴。於是忠心鼓動。子甘以死衛父。夫甘以死衛妻。兄衛弟。而朋友又互相衛。力乃百倍。一人死敵。而後立者繼。不惟公憤。且挾私仇。此蓋以至仁敵不仁。遂得此效果。賊既不得逞。遂大敗而逃。賊既見敗於脫族。乃猶謂其力勝己。不知其爲道德之力所摧挫也。六月初九日

第十四輪 三續

人民既日繁庶。脫族始議立王以統之。乃聚議以冕加諸有德者。尋選得一老人。年邁而德高。然老人雖經勸進。而仍弗至。且大憂衆之見推。旣而使者至趣駕。老人曰。余不敢蔑視吾族。使他人謂是族無人。乃至擁立乎我。爾今以冕加我。我焉敢辭。然自是以後。我將以憂死。蓋我有生以來。在此族中。本至自由。今一履尊位。遂被羈勒。吾將弗堪。語已淚落如綆。謂此爲生平不幸之事。吾實自憾吾命之修。遂抗聲曰。我知之矣。汝視仁義道德爲衆重之物。不勝其勞。今茲無人領管。顧人能自爲檢束。自爾成國。否則將踵前人之所爲。至於舉國煨燼然後已。今茲自檢弗能。乃甘心屈服於君王宇下。其視善俗之束縛。不敢爲惡。轉不如自歸於法律。較戒慎恐懼爲優。旣隸一王。或且憑其權勢而爲惡。且但求無罪。其不肯自修決矣。於是少拭其淚。言曰。汝今要我何爲者。詎欲我發號令以驅人爲善乎。人苟有爲善之資。自可行其天然之善。何必刑驅勢迫。始有爲善之一時。嗟夫。吾族。吾死期至矣。血處管中。半已凝冷。今將歸面吾先祖矣。汝輩蕩檢踰閑。不自修省。乃欲自託於法律。何其悖也。六月初十日

(未完)

眉廬叢話

(續前號)(禁止轉載)

蕙風

昔人載籍。往往不可盡信。五代胡峴北記云。契丹迫北。有牛蹠突厥。人身牛足。其地尤寒。水曰瓠瓜河。夏秋欠厚二尺。春冬欠徹底。常燒器泮犬乃得飲。又北狗國。人身狗首。長毛不衣。手搏猛獸。語爲犬嗥。其妻皆人。能漢語。生男爲狗。女爲人。自爲婚嫁。穴居食生。而妻女人食。常有中國人至其國。其妻憐之。使逃歸。與其筋十餘隻。教其走十餘里遺一筋。狗夫追之。見其家物。則銜而歸。則不能追矣。言之似甚確鑿者。迄今中外輿通。山陬海澨。電輻輳輪。無遠弗屆。殊未聞牛蹠狗首其人者。豈其種族不蕃。歷久乃底滅亡耶。抑或人禽之間。(按白虎通。禽、鳥獸總名。言爲人禽制也。又五行大義。十二時凡三十六禽。子爲燕鼠蝠。丑爲牛蟹鼈。寅爲狸豹虎。卯爲蝟兔貉。辰爲龍蛟魚。巳爲蛇。午爲鹿馬獐。未爲羊鷹雁。申爲貓猿猴。酉爲雉雞鳥。戌爲狗狼豺。亥爲豕雌豬。則無論羽毛鱗介蠃蟄之屬。皆得謂之禽矣。屢變而臻純備耶。

上海喬鸞洲(重禧)陔南池館遺集。有除蟒公傳。事絕奇偉。節其略如左。除蟒公。姓氏里居皆不傳。少年任俠。好擊刺。父爲人陷死。除蟒公年十六七。逃去。學於少林僧。十年而成。歸。手搃仇人。抉其首。告父墓。遁居吳會空山中。久之。徙居松之峯泖間。築草屋兩楹。傭山民之田以自食。郡之南。朱涇者。巨鎮也。屬華亭轄。時天久旱。不雨者七閱月。天馬橫余之間。深山大澤。故有巨蟒二。數百年伏處。未嘗爲人害。至是一蟒忽自山中出。至鎮之野。戕雞犬嬰兒無算。蟒巨甚。

盤伏農人田。禾苗盡偃。鳥鎗擊之不能中。反爲蟒斃。官民惶窘無所計。邑令懸千金募力者斬之。鄰以公告。令乃具禮詣公。公年已六十餘。髮禿盡。見人不知寒暄。口訥訥若無所能者。次日。手一杖以出。至蟒所。蟒方仰首噴毒樹間。鳥皆墜落。公伺其不備。擊其首不中。急躍至百步外。蟒已及兩肘間。肘後衣寸寸裂矣。又回擊之。中其背。而蟒已繞公身六七匝。縛若巨繩。幸一手向外。亟搯其頸。有頃。公狂呼一聲。手足劃然開。蟒骨節皆裂。殲矣。令具千金爲壽。造其廬。而公已不知所往。於是人始相傳誦爲除蟒公云。後廿年。雌蟒出來其雄。復至故所。噬人畜尤多。人爭思除蟒公。顧慮公年愈高。當不復在人間。或龍鍾非蟒敵。會有販湖縣者。言湖州山中客狀。偵之。果公。聘不至。時涇民數百詣山中。環其居。日夕號。若申包胥之泣秦庭者。公曰。吾服氣鍊形。無求人世。冀百齡從赤松子游。今若此。不復歸矣。乃出。手不持寸鐵。詢蟒所在。遽躍近蟒。蟒盤旋纏縛如前。仍以手握其領。騰躍去地尋有咫。居民皆閉戶惕息不敢出。但聞砰訇跳躍一晝夜。既之。人與蟒皆死。居民感其德。醮金肖公像。立祠祀之。題曰除蟒公祠。按除蟒公英勇冠世。可與晉周子隱殺長橋蛟事並傳。矧得之手斃父仇之孝子。尤足增重。据喬氏傳贊云。稽之郡邑志皆弗翔也。陋哉。

秀水王仲瞿孝廉。(曇)個儻負奇氣。文詞敏贍。下筆千言立就。在京師時。法梧門祭酒(式善)重其才。與孫子瀟太史。(原

29290 湘)舒鐵雲孝廉。(位)稱爲三君。作三君詠。適川楚教匪不靖。王之座師。南匯吳白華總憲。(省欽)薦王知兵。且以能作掌心雷諸不經語入告。嚴旨斥吳歸里。而王應禮部試如故。卒頗頽

失意死。識者悲之。(節陸以恬冷廬雜識)按錢塘陳退庵(文述)願道堂文鈔。王仲瞿墓志云。仲瞿好談經濟。尤喜論兵。嘉慶初。川楚不靖。總憲雲間吳公。君座主也。倚某相國。相國怙勢敗。懼及。因薦君知兵。以不經語入奏。冀以微罪避位。非愛君也。此說直抉其隱。某相國者。和珅也。墓志又云。君

性豪逸。嘗於除夕攜春屬。汎舟皋亭梅花下度歲。(有詩云、舊日林和靖、當年郁太玄、爲花閒一世、招我當三賢、有地能逃俗、無家不過年、人煙山墅裏、忙煞五更天、見煙霞萬古樓詩選)又嘗建琵琶館於吳門。延海內善彈者。品其高下。(有詩云、蘇老登塲屋、琵琶有中興、而今賀懷智、當日鄭中丞、佛國門樓近、庭

花玉樹能、不期天寶後、猶有佛傳鐙、首句自注、華亭俞秋圃、爲吳下琵琶十一人之冠、蓋蘇達子之高足也、而今句自注、蘇達子、康熙中人、生長西域、徧訪天方回部諸國、其聲始備、吳門得衣鉢者、俞秋圃一人而已、庭花句自注、玉樹後庭花、所謂陳隋調者、秋圃傳之蘇老、餘之私淑者無傳也、其逸事大率類此。

舒鐵雲餅水齋詩集。幺妹詩有序。略云。水西土千總龍躍。其先以從討吳三桂有功。世襲斯職。狃苗之畔。幕府檄調領土兵來赴。適躍臥疾。懼逗撓。乃遣其幺妹。率屯練二百人。馳詣軍門從征。前後凡二十餘戰。禽賊最夥。歲除歲事。獎以牛

酒銀牌。令還本寨。而加躍軍功一級。妹年十有八。形貌長白。結束上馬。出沒矢石間。指擣如意。亦絕微之奇兵也。凡苗以行第最稚者爲幺云。陳裴之誤舒君行狀云。君客黔西觀察王朝梧幕。會南龍苗反。大將軍威勦侯勒保。檄觀察從征。君爲治文書。侯大賞之。數召至軍中計事。苗女從征者曰龍幺妹。欲以歸君。君辭曰。非所堪也。侯益深器之。夫幺妹誠奇女子。附鐵雲而名益顯矣。偶閱王仲瞿詩。(奉和舒鐵雲姨丈見贈之作)自注。南龍之役。妖巫黃囊仙。旗鼓最盛。時檄調雲南土練中。有龍土官之幺妹者。美麗善戰。冒其兄品服。矛槍所及。輒一斃十。黃氏所部。遂不能成軍。乃至成禽。囊仙者。蠻語謂姑娘也。据此。則當日幺妹所獻之俘。亦一女子。尤奇。

有清一代。得三元二人。一長洲錢湘幹。(榮)一臨桂陳蓮史。(繼)傳爲科第盛事。常熟孫子瀟。(原湘)以乾隆乙卯二名鄉舉。以嘉慶乙丑二名登禮勝中式。殿試二甲二名進士。舒鐵雲王仲瞿賦詩贈之。同用臣無第三亦復無第一之句。竊疑三元尙有二人。若孫原湘者。殆未必有二。

嘉興沈匏廬(壽)交翠軒筆記云。宋何執中微時。從人筮窮達。其人云。不第五否。曰然。其人拊掌大笑。連稱奇絕。因云。公凡遇五。卽有喜慶。何以熙甯五年鄉薦。余中榜第五人及第。五十五歲隨龍。崇甯五年作宰相。每遷官。或生子。非五年。卽五月。或五日。見梁溪漫志。及朱彥可談。金田彥實。所居里名半十。行第五。以五月五日生。小字五兒。二十五年。鄉

府省御四試。皆中第五。年五十五。八月十五日卒。見困學齋雜錄。句吳錢梅溪（泳）履園叢話云。有楊沂秀者。貴州定遠人。嘉慶甲戌進士。幼時應童子試。縣府院考俱列第五。後鄉會榜亦俱中第五。挑選陝西鄠縣知縣。掣籤亦第五名。人稱爲楊第五。三事相符。古今如出一轍。尤奇。

清制。凡鄉試主考。會試總裁。皆硃筆親除。（硃簽款式。如請簡江南主考。閣臣票擬云。江南正考官著某去。副考官著某去。兩去字上。各留空白三字許。備硃筆填寫。）乾隆末年。有滿洲京卿名八十者。每科必膺簡命。時純廟耄期倦勤。取其名僅四畫。便於宸翰也。

吳岳廬言。十數年前。有湖南廩生樂樂樂。（名取與寡樂樂。與衆樂樂。句義。）曾屬岳廬刻印。此印姓名三字皆同。章法殊難布置。

29291
今湖南巡按使劉幼丹。前於光緒中葉。由翰林一麾出守。領袖益部。政號廉平。有妾虐婢案。尤膾炙人口。先是州別駕某。僑寓蓉會。筵室某氏。某官執拂妓也。官死。某納之。恃寵而驕。嬖伴女君焉。蓄一婢。姿首明麗。懼敝己寵。日淺虐之。輒鞭扑以百數。火針烙之無完膚。（按增韻。火針曰烙。）死而密瘞諸野。事聞於鄰。鄰白諸官。往驗之。鱗傷宛然。太守聞之怒。將拘氏窮治之。適氏有身。弗即識。既免。坐堂皇。廉得其情。擱之二十。（按韻會。擱。掌耳也。）飭別駕領歸管束。按南史。豫章內史劉休妻王氏甚妒。帝聞之。賜休妾。敕與王氏二

十杖。太守執法。毋乃類是。一時輿論所歸。謂夫五馬之威。能伏六虎。（按遜齋閒覽。延平吳氏。姊妹六人。皆妒悍。時號六虎。）其風力得未曾有。而拄杖落手者流。或感恩託庇於無形云。

吳縣王惕甫（芑孫）夫人曹墨琴像印。橢圓形象牙印。直徑八分。橫徑六分強。左方刻時裝鬪秀小像。右近邊刻墨琴二字。朱文。邊款云。墨琴淑妹小影。未子作。按陳文述譔王井未傳云。繼娶曹。字小琴。墨琴夫人弟梧岡女。据此。知墨琴有弟字梧岡。而其兄不可攷。

近人譔述。有名絳雲樓俊遇者。媻記河東君事。顧多所闕軼。雖載在牧齋集中者。亦弗能翔焉。偶閱昭文顧虞東（鎮）所譔周翁傳。得一事絕瑰偉。亟節錄如左。以餉世之好談河東君逸事者。翁字伯甫。姓周氏。芝塘里人。形體魁碩。修八尺餘。不持寸鐵。以徒手搏人。出入千百羣中。如無人也。然翁自謂以手攫搏。非能者事。嘗拱手鶴立。而侮之者儻忽顛蹶。頭腫鼻豁。若有鬼神呵之。未知何術也。又嘗謂以力駕人。無力者當坐受困乎。因力於敵。而我無所用其力。斯至爾。邑中推大力者爲陳氏子。能立水中。以隻手迎巨艦。當風急浪涌。飽帆揚舲。如矢直注。觸陳手輒止。無勇怯皆懾其力。疾翁之能也。欲得而甘心焉。倉卒遇諸隘。避之弗及。陳遽躡翁。致銳前撲。翁率繞陳左右。盤辟迴舞。陳足蹴拳舉。盡力揮斥。卒不能近。久之。翁儻攫身空際。如疾鷹急隼。倒攫凡鳥。陳驚顧。目未

承隄。翁已舉身撞其胸。陳遂不支。頽然就傾。乃匍匐稽首。願稱弟子。大將某者。號萬人敵。聞翁名。延致之。願與角技。翁固遜。疆之。笑曰。請以數十甌餽藉地。問何用。曰。恐公仆爾。大將怒發。一擊不中。翁復笑曰。公毋再擊。再擊仆矣。大將者愈怒。再擊翁。翁大呼曰。倒。應口伏地。然未見翁之舉手也。由是延爲上客。欲盡其技。顧弗能。乃厚贈遣之。時錢宗伯受之。負海內望。卜居紅豆莊。客翁。翁止其莊者數歲。河東君者。宗伯之愛姬也。才名甚噪。宗伯故豪侈。重以文章致厚賄。投遺無虛日。所受金悉貯河東所。會宗伯適邑居。劇盜數十輩。謀劫河東。因致其賞。夜圍莊。勢張甚。顧重畏翁。欲先制之。翁方浴。聞變遽起。右足入褲中。左未遑也。浴所仄。門半掩。盜數人挺槍入。翁攜尺許布捲其槍。數槍并落。徐約衣結帶。持槍奮呼出。盜震聳失氣。兔脫鼠竄。翁尾之。連刺數盜中要害。宅遼闊。盜衆。家人伏匿不敢動。盜益猖。或抉垣毀戶。直闖其室。凡四五處所。踞囂室中。索河東急。翁翁前所追盜。還擊室中盜。盜紛藉。殺一二人不止。後至益衆。翁計河東儻被劫。雖疆力者無能役矣。遂排闥負河東決圍出。匿之善所。還逐盜。盜失河東。莫能發所藏金。祛囊衣數十篋去。值翁還。爭棄擲道際。泗水脫命。盜既去。徐呼其家人收弄之。迎河東還。實不失一物。宗伯捐館。河東縊。翁去錢氏。浮沈里閭。最後客虞東大父所。年九十餘矣。兩目盡盲。猶倔彊不扶杖。每飯盡升粟。翁言初得異僧指授。積二十年乃

成。嘗屬虞東錄其法爲拳譜一卷。後失去。又數年卒於家。無子。族子某嗣。虞東論曰。錢宗伯以文章毀譽人。顧不一及翁。或謂宗伯欲祕其盜劫之事者近是。余爲表之。無使沒焉。蕙風曰。周翁誠大勇。其自謂困力於敵。而我無所用其力。未足爲其至也。其應變之識與智。不尤難能可貴耶。翁計河東儻被劫。雖疆力者無能役。負之決圍出。匿之善所。而後還逐盜。當危機眉睫間。何輕重緩急之權衡至當也。夫河東信非尋常巾幗者流。其於精徒媵夫。必有以使之魄懼而不敢犯。然而挺蘭玉之芳潔。萬一稍激烈而遽摧實。則後日勸忠殉節兩大端。不獲表見於世。詎不重可惜哉。微翁孰拯於危而成其美也。嗟乎。歲月不居。英雄老去。翁當蔽明收眠卻杖彊飯時。而回首昔年喑鳴叱咤千人辟易之雄概。殆將何以爲情耶。

又虞東文錄。有書任三殺虎事。亦瓊偉可喜。略云。歲壬戌。余館大臺莊黎氏。一夕。主人飲客。客皆短衣科跣。箕踞作牛飲。撞搪號呶。如沸羹焉。有任三者。年七十許。頭禿齒缺。猶勝酒數十斗。酒中。自言灤州殺虎事。灤粹有虎入村舍。自晨至食。殺十九人。或折手足斷額破腹出腸。旋棄去。復擇人噬。咆哮籬落間。民鍵戶竄伏。道無行者。三適有約。將過其里。親故咸尼之。三慨然曰。虎爲患若此。雖無事。猶當赴之。況與人約而更爲虎避耶。遂挾二矢往。遇虎。發一矢中足。時虎方踰大樹下。被矢怒甚。奮牙爪撲三。三踞樹樹巔。虎叩首望樹吼。葉墜地如密雨。三兩足帖樹枝。以手擦去其鬚。徐抽

矢注射。志其喉。鏃出喉間者數寸。虎培地陷尺餘斃。三躍下樹。操空卷過所約者。門闕不得入。亟敏之。大呼虎已斃。始啓門。備言殺虎狀。不卽信。其鄰里數十輩。相約執械覘虎所。見虎伏地。猶惴栗莫敢前。一二悍者稍卽之。輒反走。已而偵其果死。因共舁至隙地。剝其皮。鬻分之。於是知三之能殺虎也。方三言時。客共屏氣注目。屬耳於三。三掀髯抵掌。且飲且談。余壯之。且喜其靜客卽也。爲之浮一大白。

文錄又有中書舍人趙君行狀。趙君諱森。字再白。一字素存。籍常熟。雍乾閒人。賣文長安中。來乞者肩踵相望。新故紙積几案間以千計。歲用墨丸數斤。有欲羅致門下者。啖以好語。笑不應。嘗大書榜其壁云。聖賢豪傑。是我做出來的。不干命事。功名富貴。是命生成就的。不干我事。

昔人賣文。託始子雲相如。相如得千金。售長門賦。子雲作法言。獨富賈入贖錢千萬。願載於書。子雲不聽。曰。夫富無仁義。猶圈中之鹿。園中之羊也。安得妄載。見論衡。又潛居錄云。子雲以賣文自贍。文不虛美。人多惡之。及卒。其怨家取法言益之曰。周公已來。未有漢公之謔也。勤勞則過於阿衡云云。自唐已還。賣文獲財。未有如李邕者。邕早擅才名。尤長碑頌。雖貶職在外。中朝衣冠。及天下寺觀。多齎持金帛。往求其文。前後受納餽遺。多至鉅萬。見舊唐書本傳。杜少陵詩。聞斛斯六官未歸云。故人南郡去。去索作碑錢。本賣文爲活。翻令室倒懸。荆扉深蔓草。土銼冷疏煙。何斛斯翁之生涯

寥落。一至於此。其無當於圈鹿闌羊。視子雲殆有甚耶。若韓退之諛墓中人得金。則訾次如苴何難矣。

蕭山湯紀尙槃適文甲集。有書二俠。略云。俠者孫據德。蕪湖人。工畫山水。與蕭尺木爲友。少偕某客揚州。某以事繫獄。據德思脫其罪。無資。懸所畫於市。連不售。憤甚。裂焚之。有過者於烈焰中攫一幅。委金而去。據德追還之。徒步歸蕪湖。盡斥產。得千金。卒出某於獄。遂焚筆硯。終身不復畫。同時歛人周翼聖。亦工畫。居蕪湖。少負技擊。嘗獨行泰山。遇盜。行且及。周飛躡仆盜墮水。縱之。投邸店。夜剝扉急。啓門。盜也。盜固逆旅主。周念無可逃。出勞之。盜喜。置酒。請爲弟子。酒酣。周刺刺述生平任俠事。盜益喜。出金爲周壽。晨熹微。周辭盜躡履去。盜尾送數十里。喜極而悲。泣請曰。某無賴。幸遇君。不然。死矣。自今願易行。周與指陳大義。且曰。大豪傑無他。不諱過耳。盜渴誠聽受。鄭重而別。嚮來俠士皆勇夫。若孫據德者。獨能以藝事行其俠。乃至斥產脫友罪。近於敦勵庸行者所爲。卽以俠論。亦加人一等矣。若夫周翼聖所遇之盜。何其遷善改過之果且速也。人孰生而爲盜甘心爲盜者。往往老死不聞德義之言。乃至陷溺終其身而不克自拔。詎不重可哀哉。

偶閱延綬志有云。崇禎癸未仲冬。闖賊陷延安城。留賊將河南人張某據守。明年五月。張某叛。闖遣悍賊名小瞎子者。率兵萬餘圍城。城破。將屠之。令已下矣。則索故所狎妓妙玉兒

29294 出。告之故。玉兒泣請收回成命。弗許。因盡出其所贈繡襦珠璫。蓬髮囚首。匍匐以死請。賊意解。乃得免屠。城賴以全。坐罪張某一人而已。此與光緒庚子聯軍之役。吳孃賽金花。自達於德帥瓦德西。保全東南宦族及厥肆書籍事略同。國變後。賽猶淪落滬濱。甲寅六月。嬰疾幾殆。方沈頓閒。其老母年逾七十矣。為禱於某女巫。巫託神語決無患。謂夫夙種善因。事在十數年前。巫固駭。絕不省北都事。漫為無稽之言。乃與事實闇合。未幾。賽亦竟占勿藥。絕奇。

漚尹言。有人傳誦宗室瑞臣(寶熙)近作詩鐘句。帝時燕領云。高帝子孫龍有種。舊時王謝燕無家。何言之沈痛乃爾。又漚尹舊作。黃山谷蠹魚分詠云。特派縱橫不羈馬。書叢生死可憐蟲。亦渾雅。

相傳吳郡某方伯。清之季年。開藩江右。一日。在籤押房接見僚屬。值春陰。室稍闌。見方伯兩足一鞢一鞢。咸賦異。明日再見亦如之。或審諦。則非一鞢一鞢。乃鞢一黑一白耳。顧鞢黑特甚。微詢之侍者。則數日前甚雨初霽。方伯散步後園。誤插足泥淖中。泥汚其鞢及脛。尙未經更易也。辛亥已還。方伯避地滬上。僦居一樓。方伯不輕下樓。非位望與方伯若。亦毋庸上樓。某日卓午。某鉅公過訪。值方伯晨興。近案坐。著鞢未竟。案陳寒具二。客至。方伯輟鞢。起迎客。隨手置鞢寒具上。客坐定。方伯從容著鞢竟。自手一寒具。而以其一屬客。客亟敬謝弗遑云。

常熟相國翁叔平。相國文端公子。濟寧大司寇孫文恪。大司徒文定公子。翁孫固通家。誼夙厚。同治壬戌。兩公子同捷禮勝。文端以狀頭期相國。願文恪。勅敵也。方意計開。俄文恪造謁。文端亟出見。禮貌彌殷。因語文恪。世兄寓京日淺。於廷試規則。或未盡諳悉。小兒幸同譜。曷暫移寓敝齋。俾晨夕互切磋。老夫公餘獲暇。亦貢愚一二也。於是文恪移居翁邸。與相國共硯席。每日練習殿試卷。或作試帖詩。文端輒獎藉指陳。不遺餘力。未幾。殿試期屆。先一日。輟課休息。既夕。相國入內寢。文恪宿外舍。甫就枕。則文端出。與深談試事逾時許。始鄭重別去。文恪又就枕。頃之。則又出。問筆墨整飭未。筆墜用否耶。則就所書殿試卷餘幅。親為試筆。蟬聯如千行。每畢一行。輒自審諦。謂老眼幸無花也。久之。試筆竟。又從容久之。乃曰。明日試期。當及時安息矣。匆匆竟去。則夜已逾丙矣。文恪仍就枕。稍輾轉反側。俄聞傳呼。促庖人進饌矣。促庖人駕車矣。僮從祇伺者皆起。語聲紛然。文恪竟不得寐。匆匆遽起。食畢登車而去。是日以精神較遜。弗克畢殫能事。洎臘唱。得第二人。而相國以第一人及第矣。

清之季年。朝野競尚科第。尤醉心鼎甲。乃至耆臣碩望。為繼體策顯榮。不恤詭道達勝算。晚近世風不古。不亦甚可慨哉。乾隆壬子科。侍郎吳省欽。典試江西。榜發。士子有少目豈能觀文字。欠金切莫問科名之聯。見高安朱鐵梅。江城舊事。江城舊事引續表忠記云。劉綏家居。(按。綏字省吾。南昌人。

明神宗朝名將、所用鑊鐵刀、重二百二十斤、天下稱劉大刀、戰死於清風山、嘗乘黃舫。將之旁郡。岸上有少林僧。自矜拳勇。索敵無偶。艇船尾一老嫗呼僧曰。吾船上弟七娘子來。忽少婦帕首袴褶。面微紫。年可十八九。登岸與僧周旋者三。僧舒左臂從後高舉少嫗。聚觀者大噪。嫗曰。少下。僧如其言。婦曰。再少下。語未畢。忽旋身以足尖蹴僧喉。仆地幾死。少嫗神色不動。艇在船中凭几大笑。嫗從容回船。解纜去。有識者咋舌曰。此南昌劉大刀也。門下多蓄異人。禿鷲乃敢捋虎鬚耶。又引明季北略云。無錫秦燈。力舉千斤。聞滁州武狀元陳錫多力。往與之角。將柏木八仙檣。列十六窠。果盒悉具。設酒二爵。秦燈隻手握案足。能舉而不能行。陳錫則能行。力較大矣。然廬數步而止耳。唯劉艇繞庭三匝。而爵盞如故。其力更有獨絕者。又自注有云。艇姬妾二十餘。極燕趙之選。皆善走馬彈棊。艇每出巡。諸姬戎裝著小皮鞋。跨善馬為前導。四勇士共舉刀架繼之。艇在其後。旁觀者意氣亦為之豪。据此。則岸次蹴僧之少嫗。屬虎帥擁統之列矣。鷲燕導前。貌猊擁後。求之古名將中。得未曾有。而鷲燕即貌猊。尤奇。

江城舊事。又有葉節母以詩擇婿一則。尤雅故也。略云。汪翬雲(軫)魚亭集。有納徵詩。自序云。軫孤且貧。賣文無所售。有南昌節母葉孺人者。重予詩。延課二子。予病疫濱死。命二子謹護予。獲更生焉。越一歲。察予之格也。託媒氏字予以女。且曰。吾以詩擇婿。請仍以詩為儀。他無所需。於是敬賦納徵

詩二章。因盛水師熊浣青往聘焉。鍍金作鳳凰。兩兩張奇翼。欲盡茲鳥神。頗費工人力。相許在高枝。桐花為結實。好風萬里來。文彩共相惜。東南有嘉木。上生連理枝。雲中有好鳥。息此青華姿。失陽深照耀。錦翰互參差。請看雙飛翼。翔翔度天漣。世人擇婿。多計家賞。故貧士往往不得妻。若其破庸俗之見。別具藻鑑。雖丈夫難之。況婦女乎。軫為一時名下士。而貧不自振。憐才如葉母。可謂巾幗中之絕特者矣。

錢塘戴文簡(敦元)數理最精。滿屋列小泥人。暇則為之推算。云其成毀。亦如人生死也。(見韓泰華無事為福齋隨筆)相傳明萬曆間。內廷造觀音像大小各一。命日者推算。大像壽命不甚縣長。小像合受數百餘年香火。神宗敕大者供養禁中。小者龜置前門外市廟。迨崇禎甲申。大像為闖賊所毀。而市廟之像。俗傳籤卜最靈。(按說文、籤、驗也、玉篇、竹籤、用以卜者)乃至清之末年。猶香火甚盛。膜拜者踵相接也。則推算泥人。明人有能之者。不自戴文簡始。

北京前門城樓。相傳有狐仙居之。樓前窗榻。今日此開彼闔。明日彼闔此闔。奈日未有同者。曩余常川入直。前門為必由之路。留心此之誠然。竊意地高風勁。窗榻未經牢穩。自必因風開闔。無庸故神其說也。

有清一代。天澤之分恭嚴。往往繁文縟節。近於苛細。然亦有禮行自上者。故事雖內臣奏事。主上不冠。則不進見。盛暑除冠。則有小內侍捧立於旁。見臣下亦不用扇。俟一起畢。(召

29296 見一人，爲一起，稍揮數扇。仍納於袖。再見一起。

內閣漢票簽處。壁懸橫幅一紙。爲攀龍鱗附鳳翼六字。字徑三尺。而不署款。白紙黑字。印畫甚真。閱蔣苕生忠雅堂集。

知爲虞永興書。碑二片。在趙州梅林寺。列東西墀。寺壁尚有吳道子畫水。賈筆也。（節許善長碧聲吟館談塵）又攀龍附鳳四字。在今西安貢院。爲虞世南書。係明時所翻。原刻四川中江巖上。曾訪之未得。（節無事爲福齋筆記）按已上二家所記。

未知是一是二。當是永興此書。翻撫不止一處。韓氏云云。或誤敘鱗翼二字耳。

金陵隨園有二。揚州亦有隨園。見前話。又關中羅賢。亦有隨園。其自記云。余關地誅茆。偶有怪石。便壘爲山。偶臨水。便濬爲池。偶折柳。植而環之。有草不除。落花不掃。讀易其中。喟然歎曰。隨之時義大矣哉。隨地而安之。亦隨地而樂之。孔子曰。樂亦在其中矣。遂自號曰隨園云。見無事爲福齋隨筆。則隨園有四矣。

崑山朱以載（厚章）多師集。楊九娘廟歌。自序略云。嘉定縣志。楊九娘。性至孝。父命守桔槔。苦爲蚊嚙。不易其處。竟以羸死。土人立廟祀之。按此與露筋祠事絕類。彼以貞。此以孝。後先輝映矣。

諸葛武侯在隆中時。客至。屬妻治麵。坐未溫而麵具。侯怪其速。後密覘之。見數木人斫麥。運磨如飛。因求其術。演爲木牛流馬云。此說絕新。見明謝在杭（肇淪）五雜俎。不知其何

所本也。

名士有潔癖者。至米海嶽。倪雲林。殆蔑以加矣。閩閩中人。亦多有潔癖。其尤甚者。五雜俎云。汪伯玉先生夫人。繼娶也。蔣姓。性好潔。每先生入寢室。必親視其沐浴。令老嫗以湯從首澆之。畢事卽出。翌日。客至門。先生則以啼髮辭。人咸知夜有內召矣。似此潔癖。殆復不能有二。設令易釵而弁。庶幾駕米倪而上之矣。

五雜俎云。漢卜式。司馬相如。皆入賞爲郎。則知古者階爵之制。其來已久。蓋亦當時開邊治河。軍國之需不足。而取給於是也。然止於爲郎而已。至桓靈時。始賣至三公。按清制。捐納一途。京官亦至郎中止。庶幾媲美西京。賢於東漢末造遠矣。然而桓靈時之三公。特誦言賣耳。君子謂其直道猶存也。

機器製造。吾國古亦有之。璇璣玉衡。以齊七政。萬世巧藝之祖。無出歷山老農矣。皇帝之指南車。周公之欵器。其次也。公輸之雲梯。武侯之木牛流馬。又其次也。南齊祖沖之。因武侯有木牛流馬。乃造一器。不因風水。施機自運。不勞人力。又造千里船。於新亭江試之。日行百里。及欵器指南車之屬。皆能製造。北齊胡太后。使沙門靈昭。造七寶鏡臺。三十六戶。各有婦人。手各執鑠。才下一關。三十六戶。一時自閉。若抽此關。諸門皆啓。婦人皆出戶前。唐馬登封。爲皇后製妝臺。進退開合。皆不須人。巾櫛香粉。次第迭進。見者以爲鬼工。元順帝自製宮漏。藏壺匱中。運水上下。匱上設三聖殿。腰立

玉女。按時捧籌。二金甲神擊鼓撞鐘。分豪無舛。鐘鼓鳴時。獅鳳在側。飛舞應節。匱兩旁。有日月宮。飾以金烏玉兔。宮前飛仙六人。子午之交。仙自耦進。度橋進三聖殿。已復退。立如常。今廣州猶有銅壺滴漏。亦元人製。第略防其意。不能如宮漏之精美耳。

上元梅伯言先生柏槻山房文鈔。有標題曰記聞者。事絕奇偉可傳。文尤簡重。足以傳之。遂錄如左。(稍刪節)杜奎熾。昌黎狂生也。以狂死。嘉慶戊辰應鄉試。書策後千餘言。言直隸官吏不能奉宣德意。旂民買漢人田。免租。漢人買旂民田。沒其田。且治罪。非普天下王臣王土之意。又民遇饑饉。毋得攜族過山海關。非古人移民移粟之道。又言後之人君。不以一權與人。大小事必從中覆。臣下皆無所爲作。委成敗於天子。不能給。則委之律例。故權之名出於天子。而其實則出於吏。與其權出於吏。無寧分其權於臣。書聞。大臣訊之曰。汝年少。不知爲此。言指使者免罪。奎熾大言曰。奎熾所言。皆忠孝事。天生之。孔孟教之。何者爲指使。奎熾生十八年。今乃知孔孟爲千古忠孝訟師。訊者皆噤且怒。或叱曰。汝沽名耳。何知忠孝。奎熾曰。然。奎熾誠沽名。然奎熾今死矣。公等爲宰輔。受大恩。萬一樹牙頰。論列是非。朝廷念大體。當不死。輕者罰一歲俸。至款段出都門。極矣。公等愛一歲俸不沽名。奎熾以性命沽名。奎熾誠沽名。遂罷訊。按。杜生之論。得之百數年前。雖朝陽鳴鳳曷逮焉。

清有兩張國樑。一雍正朝。雲南提督贈右都督張國樑。諡勤果。一成豐朝。江南提督幫辦軍務張國樑。諡忠武。見諡法考。(按。兩公之名。並用俗梁字。作樑。)

前話記塔忠武戰馬。又有陳都督義馬。亦可傳也。道光辛丑。英艦犯廣州。都督陳建陞。禦之沙角之礮臺。死之。馬爲英軍所得。飼之他願不肯食。乘之蹶蹶弗克上。棄之。悲鳴跳擲而死。三水歐陽雙南。爲賦義馬行云。有馬有馬。公忠馬忠。公心唯國。馬心唯公。公殲羣醜。馬助公鬪。羣醜傷公。馬馱公走。馬悲馬悲。公死安歸。公死無歸。馬守公屍。賊牽馬怒。賊飼馬吐。賊騎馬拒。賊棄馬舞。公死留鏹。馬死留騾。死所死所。一公一馬。

滬上愚園。有長短人各一。短人非甚短。長亦未足爲長。按宋岳珂程史云。姑蘇民唐姓者。兄妹俱長一丈二尺。又五雜俎云。明時口西人。長一丈一尺。腰腹十圍。其妹亦長丈許。儻愚園之長人見之。殆猶不敢望其項背矣。

歐洲各國。僧皆娶妻生子。與常人無異。吾國亦有之。五雜俎云。天下僧。唯鳳陽一郡。飲酒食肉娶妻。無別於凡民。而無差徭之累。相傳太祖湯沐地。以此優恤之也。(按明太祖。曾入皇覺寺爲僧。宜其優禮僧人獨異。)至吾閩之邵武汀州。(按謝在杭。閩人。)則僧衆公然蓄髮。長育妻子矣。寺僧數百。唯當戶者一人削髮。以便於入公門。其他雜處四民之中。莫能辨也。按陶穀清異錄。謂僧妻曰梵嫂。番禺雜記。載廣中僧有室家者。

29298 謂之火宅僧。則他處亦有之矣。又百粵風土記云。僧多不削髮。娶妻生子。名曰在家僧。

四庫全書總目存目。交友論一卷。明利瑪竇撰。(按。明時西人入中國者。皆自稱歐羅巴人。)萬曆己亥。利瑪竇遊南昌。與建安王論友道。因著是編以獻。有云。友者過譽之害。大於仇者過譽之害。此中理者也。又云。多有密友。便無密友。此洞悉物情者也。自餘持論醇駁參半。西洋人入中國。自利瑪竇始。利瑪竇所著書。又有二十五言一卷。西洋宗教傳中國。自二十五言始。

東坡樂府。菩薩蠻詠足云。塗香莫惜蓮承步。長愁羅襪淺波去。只見舞迴風。都無行處蹤。儻穿宮樣穩。並立雙趺困。織妙說應難。須從掌上看。按。詩詞婢詠織足。自長公此詞始。前乎此者。皆斷句耳。

吾國人精建築學者。嘗彙記之得數事。宋時木工喻皓。以工巧蓋一時。爲都料匠。著有木經三卷。識者謂宋三百年一人而已。皓最工製塔。在汴起開寶寺塔。極高且精。而頗傾西北。人多惑之。不百年平正如一。蓋汴地平無山。西北風高。常吹之。故也。其精如此。錢氏(吳越王)在杭州建一木塔。方兩三級。登之輒動。匠云。未瓦。上輕。故然。及瓦布。而動如故。匠不知所出。走汴。賂皓之妻。使問之。皓笑曰。此易耳。但逐層布板訖。便實釘之。必不動矣。如其言。乃定。皓無子。有女十餘歲。臥則交手於胸。爲結構狀。或云。木經。女所著

也。明徐杲以木匠起家。官至大司空。嘗爲內殿易一棟。審視良久。於外別作一棟。至日斷舊易新。分豪不差。都不聞斧鑿聲也。又魏國公大第傾斜。欲正之。計非數百金不可。徐令人囊沙千餘石置兩旁。而自與主人對飲。酒闌而出。則第已正矣。以伎倆致位九列。固不偶然。又唐文宗時。有正塔僧。履險若平地。換塔杪一柱。不假人力。傾都奔走。皆以爲神。宋時真定木浮圖十三級。勢尤孤絕。久而中級大柱壞欲傾。衆工不知所爲。有僧懷丙。度短長。別作柱。命衆維而上。已而卻衆工。以一介自隨。閉戶良久。易柱下。不聞斧鑿聲也。明姑蘇虎邱寺塔傾側。議欲正之。非萬緡不可。一遊僧見之曰。無煩也。我能正之。每日獨攜木楔百餘片。閉戶而入。但聞丁丁聲。不月餘。塔正如初。覓其補綻痕迹。了不可得也。三事極相類。而皆出遊僧。尤奇。至於浙人項昇。爲隋煬帝起迷樓。凡役夫數萬。經歲而成。樓閣高下。軒窗掩映。幽房曲室。玉闌朱楯。互相連屬。回環四合。曲屋自通。千門萬牖。上下金碧。金虬伏於棟下。玉獸蹲於戶旁。壁砌生光。瑣窗射日。工巧之極。自古無有。人誤入者。雖終日不能出。帝大喜。因以迷樓目之云。則雖失之導淫逢惡。然其經營締造之窮工極緻。要亦曷乎弗可及矣。竊意西人之於建築。唯是高堅鉅麗。是其能事。若夫五步一樓。十步一閣。鉤心鬪角。藻周慮密。則吾中國古之良匠。殆未遑多讓焉。乃至喻皎徐杲輩之神明變化。不可方物。不尤古今中外所難能耶。

世俗稱美人之材勇。輒曰十八般武藝。無一不精。斯語也。傳奇演義家多用之。蓋在百年或數十年前。迄今滄桑變易。火器盛行。往往一彈加遺。烏獲孟賁無能役。快劍長戟失其利。卽斯語亦等諸務去之陳言矣。攷明英宗正統乙巳夏。詔陳懷井源等。練京軍備瓦刺。招募天下勇士。山西李通者。行教京師。試其技藝十八般。皆無人可與爲敵。遂膺首選。十八般之名。一弓。二弩。三鎗。四刀。五劍。六矛。七盾。八斧。九鉞。十戟。十一鞭。十二簡。十三槁。十四叉。十五叉。十六把頭。十七綿繩套字。十八白打。平南黎謙亭。(建三)乾隆戊子舉人。官涇州知州。著有素軒

詩集梓行。其璽玉行有序云。于闐貢大玉三。大者重二萬三千餘斤。小者亦數千斤。役人畜挽拽。率以千計。至哈密有期矣。嘉慶四年。奉詔免貢。詩以紀事。詩云。于闐飛檄馳京都。大車小車大小圖。軸長三丈五尺咫。塹山導水堙泥塗。小玉百馬力。次乃百十逾。就中璽玉大第一。千蹶萬駟行踟躕。日行五里七八里。四輪生角千人扶。又云。詔書寶善不寶玉。嗟哉巨璞輕錙銖。所到之處卽棄置。毋重百姓罹無辜。又云。大玉礪琢鑄其瑜。小玉剗鑿爲龜趺。大書己未卹民詔。金寒石泐玉不淪。按。貢玉大至二萬三千餘斤。殆古昔所未有。此詩足備掌固。因節錄之。(未完)

歷史小說
絳帶記
法國大仲馬原著

(續前號)
(不許轉載)

天游

第三十四章

29299
次晨十點鐘。白藜閣送了二萬佛郎來。一半金圓。一半西班牙紙幣。說梅夫人昨夜住在采薇妮夫人家。議定的計策。不更改了。談了一回。自去找龐彪圖。哈曼德趁空又到斐德兒家。鮑維德仍舊沒有消息。斐德兒見哈曼德換了黑衣。揸着手槍。手中拿着馬鞭。行色匆匆。知道沒有好消息。便也不問。耐鐵從外面回來。說鮑維德仍舊沒有到藏書樓去。斐德兒急得哭了。

哈曼德纔露了些話風。說鮑維德不定爲了鈔寫關於政治上的文件。給人家拿住了。這件事與鮑維德無干。諒來不過暫行監禁。風頭過了。自會釋放出來。斐德兒稍覺放心。看看兩點鐘光景。哈曼德起身告辭。說等會過客。再來談天。恰好這時候。隊長騎了一匹灰色駿馬。飛也似來了。到得門外。下了馬。繫了韁。走上樓來。哈曼德含笑相迎。那隊長却不知爲什麼呆着臉。不聽不睬的。哈曼德暗暗吃驚。寒暄已畢。說起那件事來。哈曼德問起他手下壯士招呼了沒有。隊長道。咱把他們安插在聖瑪